

## DOMENIE XXV «VIE PAL AN»

### Antifone di jentrade

**J**o o soi la salvece dal gno popul, al dîs il Signôr.  
In cualsisei tribulazion mi clamaran,  
jo ju scoltarai e o sarai il lôr Signôr par simpri.

### Colete

Diu, che tu âs fondade dute la tô sante leç  
sul amôr par te e pai fradis,  
danus la gracie di meti in vore i tiei comandaments  
par podê rivâ a la vite eterne.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Sap 2,12.17-20

**Condanìn il just a une muart vergognose.**

Dal libri de Sapience

I triscj a disin:

«Tindìn palissis al just, parcè che nus intrighe,  
si met cuintri des nestris voris,  
nus bute in muse ce che o fasìn cuintri de leç  
e nus cride parcè che o lin cuintri  
di cemût che nus àn tirâts sù.

Viodìn mo se lis sôs peraulis a son veris  
e provìn ce che i sucedarà tal ultin.

Se il just al è propit fi di Diu, lui i darà une man  
e lu liberarà des mans dai nemîs.

Metìnlu a lis provis cun ofesis e cun torments,  
par viodi trop dolç che al è  
e par stazâ trop che al sopuarte il mâl;  
condanìnlu a une muart vergognose,  
parcè che, daûr ce che al dîs, Diu lu pararà».  
Peraule di Diu.

### SALM RESPONSORIÂL dal Salm 53

**R.** Tu sês tu, Signôr, il gno jutori.

Diu, pal to non dami salvece,  
fasimi justizie cu la tô fuarce.

Diu, scolte la mê preiere,  
tint l'orele a lis peraulis de mê bocje. **R.**

Parcè che cuintri di me i forescj si son metûts  
e une intate e cîr di copâmi;  
nol è Diu denant di lôr. **R.**

Ve, che Diu al vignarà a judâmi,  
il Signôr al ten sù la mê vite.

Cun dut il cûr ti ufrissarai il sacrifici,  
il sacrifici di laut al to non che al è bon, Signôr. **R.**

### SECONDE LETURE Jc 3,16-4,3

Ce che al ven de justizie al è semenât inte pâs, par chei che a fasin opare di pâs.

De letare di san Jacum apuestul

Benedets, là che e regne la gjelosie e il spirt di contradizion, al regne il disordin e ogni sorte di brutis azions. La sapience che e ven di adalt invezit e je prime di dut monde; po e puarte la pâs, il biel trat, e lasse cori, e je plene di boncûr e di buinis oparis, cence diferencis e cence falsetâts. Ce che al ven de justizie al è semenât inte pâs, par chei che a fasin opare di pâs.

Dontri vegnino mo lis vueris e lis barufis che o vês fra di vualtris? No vegnino propit des vuestris vois che a sbuliin dentri di vualtris? O vês gole e no rivais adore di vê e alore o copais; o vês invidie e no rivais adore di vê e alore o barufais e o fasês vuere. No vês parcè che no domandais; o domandais e no us ven dât parcè che o domandais malamentri, par straçâ dut tes vuestris brutis vois. Peraule di Diu.

### CJANT AL VANZELI cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,  
parcè che ai piçui tu âs palesât i misteris dal ream dai cîi.

R. Aleluia.

### VANZELI Mc 9,30-37

Il Fi dal om al sarà consegnât...Se un al vûl jessi prin, al à di jessi il famei di ducj.

Dal vanzeli seont Marc

In chê volte, Jesù e i dissepui a levin a travers de Galilee, ma lui nol voleve che nissun no lu savès. Di fat al jere daûr a inscuclâ i siei dissepui e ur diseve: «Il Fi dal om al sarà consegnât tes mans dai oms, che lu coparan; ma, copât che al sarà, dopo trê dîs al resurissarà». Lôr però no capirin chestis peraulis e a vevin rivuart a fâi domandis.

A rivarin a Cafarnau e cuant che al fo in cjase ur domandà: «Di ce cuistionaviso par strade?». Lôr però a tasevin, parcè che a vevin cuistionât fra di lôr sun cui che al jere il plui grant. Alore lui, dopo di jessisi sentât, al clamà i Dodis e ur disè: «Se un al vûl jessi prin, al à di jessi l'ultin di ducj e il famei di ducj». Po, cjapât sù un frut, lu metè tal mieç di lôr e, strenzintlu tai braçs, ur disè: «Chel che al acete un di chescj fruts tal gno non, mi acete me; e chel che mi acete me, no mi acete me ma chel che mi à mandât».

Peraule dal Signôr.

### Su lis ufiertis

Acete vultintîr, Signôr, i regâi dal to popul,  
par che al puedi vê, cui sacraments dal cîl,  
ce che al professe cu la devozion de fede.  
Par Crist nestri Signôr.

### Antifone a la comunion Sal 118,4-5

Tu tu âs dât ordin, Signôr, che i tiei decrets a sedin metûts ben in vore.

Che a sedin sigûrs i miei trois  
par che o puedi meti in vore i tiei ordins.

### O ben: Zn 10,14

Jo o soi il bon pastôr, o cognòs lis mês pioris  
e lis mês pioris mi cognossin me, al dîs il Signôr.

### Daspò de comunion

Compagne simpri, Signôr, cul to jutori

chei che tu ristoris cui tiei sacraments,  
par che o podîn sintî i efiets de redenzie  
tai misteris e te vite.  
Par Crist nestri Signôr.